

新  
疆  
建  
置  
志

關中叢書

新疆建置志

邵力子著

陝西通志館印

## 新疆建置志弁言

先生此書成於前清光緒丁未即三十四年先生時領新疆通志局其體裁仿漢書地理志史記貨殖傳其間蒐羅宏富駁辨精審爲自來金方志乘所莫及今雖共和告成金甌無缺然中國大勢究以西北爲重而新疆實爲之門戶良以其地蒙番雜處逼近強隣撫御一有不當則邊釁易生非明於風俗察於地理斷不能措置裕如得此書以爲之導師不啻獲夜行之燭斷港之舟矣爰假聚珍排印成帙願與海內志士共相研究邊氓庶有豸乎先生又著有新疆山脈志四卷正與此書相表裏他日當續出以期完備庶留心西北

者得以觀覽焉中華民國二年三月胡文濬舜琴謹識

新疆建置志卷一

醴泉宋伯魯芝田撰

總敍

新疆古雍州外地也自漢武通西域設都護治烏壘城天山以南城郭三十六國皆屬焉東接玉門陽關西至葱嶺南北有大山河流其中而天山以北東爲匈奴西爲烏孫未嘗服屬於漢後漢山北無所改而山南分爲五十餘國于闐龜茲最著自建武至於延光三絕三通設都護及長史治所以統之三國及晉北爲烏孫及鮮卑西部南爲于闐龜茲諸國如故北魏蠕蠕烏孫悅般高車盡有山北之

地後周突厥鐵勒又據之其南則鄯善盛大役屬諸國迄  
隋突厥鐵勒西突厥雄於北而于闐龜茲諸國猶昔無所  
分併唐之沙陀突厥回鶻西突厥諸屬北部者皆設都督  
府復置北庭大都護府於西州後庭縣以統之而山南諸  
國則置安西大都護府於龜茲使統各都督府復以于闐  
疏勒碎葉焉耆別爲四鎮中葉以後爲吐蕃所有五代併  
於吐番回鶻至宋則烏孫回鶻居山北而于闐龜茲諸國  
悉入於遼元時北爲阿爾穆爾舊音阿里麻里考見後及回鶻五城  
即別石  
把地  
失八里  
舊音別  
見後  
考見後  
諸國而統於宣慰司元帥府明代四衛拉特爲北部

衛拉特出脫徵太師及額森瓦刺可汗之裔是爲額魯特  
四衛拉蒙古四衛拉者曰綽羅斯曰都爾伯特曰和碩特  
曰土爾扈特其後土爾扈特竄附俄羅斯而以杜爾伯特之輝特別爲一部仍稱四衛拉如故其南部則  
巴什伯里葉爾羌土爾番諸國回部派噶木巴爾諸族居  
之清初中原粗定未遑遠略於是噶爾丹自立爲準噶爾  
汗吞噬隣屬數爲邊害聖祖三臨朔漠皆滅其衆北土以  
寧其姪策妄阿拉布坦收其遺孽遁保伊犁至子噶爾丹  
策凌恃其險遠以兵侵服山南回部執其酋長而收其租  
賦傳子策妄多爾濟那木札爾益殘暴喇嘛達爾札襲而  
代之達瓦齊策妄之再從姪孫復殺達爾札而奪其位而凶殘益  
甚衆部皆不堪命於是都爾伯特台吉策凌等及輝特台

吉阿睦爾撒納和碩特台吉班珠爾等先後率部衆納款乞興師討達瓦齊天子乃以班第爲定北將軍永常爲定西將軍將衆五萬馬七萬匹西出巴里坤北出烏里雅蘇台往擊之各齋兩月糧期會於博羅塔拉衆鄂拓克聞之皆迎降出食給軍師至伊犁達瓦齊潰走回人阿奇木伯克霍集斯執以獻勒銘格登山準噶爾平事在乾隆二十年是時阿睦爾撒納覬爲總台吉弗得煽其衆以叛將軍策楞擊破之阿逆走哈薩克而準部諸台吉亦相繼作亂將軍兆惠副將軍富德討平之復擊降哈薩克阿逆奔俄羅斯痘死勒銘寧遠東岡御製文四體字伊犁復定初回酋波羅泥都霍

集占久繫準噶爾王師平伊犁釋其縛使波羅泥都歸葉爾羌城使霍集占居伊犁其年霍集占叛歸舊穴燭衆回作亂其後三年大兵克庫車沙雅爾阿克蘇烏什諸城明年收和闐喀什噶爾葉爾羌諸城二酋遁入拔達克山境拔達克山西函其首以獻回部以平乃建總統伊犁等處將軍參贊大臣辦事大臣同知總管等官以董理之而以準部之烏魯木齊爲迪化縣分隸甘肅省爵準回投誠者各有差設分理回務諸札薩克伯克令統馭其衆畫境鈐轄悉如腹事在乾隆二十四年省初土爾扈特與策妄不協將其衆奔俄羅斯其汗渥巴錫台吉策伯克多爾等慕朝廷威德

率衆三萬戶萬里來歸天子嘉其誠錫以爵而授之牧地處其衆於伊犁塔爾巴哈台諸境而四衛拉特全部盡入版圖矣當此時東至喀爾喀瀚海西至薩瑪爾罕及葱嶺一帶南至衛藏北至俄羅斯及左右哈薩克東南至甘肅西南至葱嶺拔達克山東北至俄羅斯西北至右哈薩克廣輪二萬餘里而藩屬之效順者若哈薩克布魯特霍罕安集延塔什干巴達克山博洛爾愛烏罕痕都斯坦巴勒提復十餘國自建元永平以來未嘗有若斯之盛已當此時北自伊犁至於鎮西南自闢展至於阿克蘇皆沃野千里歲入粟米四十萬三千餘石帶甲之士四萬先後建官

# 自將軍都統以下文武之職九百餘員

伊犁總統將軍一員領隊大臣四員

塔爾巴哈台參贊大臣一員協辦領隊大臣一員游牧領隊大臣一員以上乾隆二十七年設烏魯木齊都統一員古鞏寧城領隊大臣一員庫爾喀喇烏蘇領隊大臣一員古城領隊大臣一員光緒初裁領隊設古城城守尉築滿城居之專管旗兵巴里坤領隊大臣一員土魯番領隊大臣一員哈密辦事大臣一員以上乾隆三十八年設喀什噶爾參贊大臣一員協辦大臣一員和闐領隊大臣二員烏什辦事大臣一員阿克蘇辦事大臣一員庫車辦事大臣一員英吉沙爾領隊大臣一員葉爾羌辦事大臣一員協辦大臣一員喀喇沙爾辦事大臣一員以上乾隆二十五年設至南八城文職則有鎮迪糧務兵備道一員光緒初加按察使銜鎮西府知府一員後改廳迪化直隸州一員後升府宜禾奇台昌吉阜康知縣各一員後省宜禾以上乾隆二十七年設武職則烏魯木齊提督一員哈密協副將一員益之以文武僚佐凡伊犁大小職官四百六十八員塔爾巴哈台六十五員烏魯木齊四百八員土魯番三十二員哈密五員列戍開屯星羅雲布而西北宴然無烽合九百七十八員

燧之警者百有餘年其後雖有烏什昌吉張格爾之亂而天戈所揮指顧卽定咸豐之初朝廷方用兵東南而新疆承平日久武事廢壞於是黠回金相印乘勢謀復故土乃陰結安集延酋阿古柏作亂陝回白彥虎應之盡失天山南北之地事在同治三年是時東南大定而雍涼方告急天子乃命左宗棠爲欽差大臣移師討之旣定秦隴將出關而公卿議者皆以爲不便宜罷西征與民休息宗棠以爲時不可失抗疏爭之天子以爲然不數年雲徽席捲盡復故所失地獨伊犁一隅尙爲俄有宗棠乃建議開行省置府縣爲久遠計上以伊犁未歸弗許及西四城逸酋糾衆寇邊

宗棠以爲非革除舊俗漸以華風難冀久安長治復抗疏

申前議疏云按新疆形勢北路則烏魯木齊南路則阿克  
擬設新疆總督治烏魯木齊設新疆巡撫治阿克蘇將軍  
率旗營駐伊犁塔爾巴哈台改設都統並統旗綠各營伊  
犁增設兵備道塔爾巴哈台設同知北路迪化道仍其舊  
升迪化直隸州爲府附郭置迪化縣並舊設之奇台昌吉  
阜康綏來四縣隸焉升呼圖壁巡檢爲圖壁縣濟木薩縣  
永爲濟木縣改鎮西廳同知爲直隸州知州仍復原設宜  
禾縣改哈密通判爲直隸廳同知於吐魯番增設廣安道  
改吐魯番同知爲廣安直隸州知州升闢展巡檢爲闢展  
縣增設托遜縣南路阿克蘇增設分巡道阿克蘇卽古溫  
宿國設溫宿府治之附郭置溫宿縣於尹阿瓦提置尹阿  
縣於拜城置拜城縣均隸溫宿府庫車卽古龜茲國設鳩  
茲府治之附郭置鳩茲縣於沙雅爾置沙雅縣均隸鳩茲  
府喀喇沙爾卽古焉耆國設焉耆直隸州治之於庫爾勒  
置庫勒縣隸焉烏什卽古尉頭國於其地設尉頭同知凡  
二府所屬統轄於阿克蘇道喀什噶爾設兵備道喀什噶  
爾卽古疏勒國設疏勒府治之於漢城置疏勒縣回城置

疏附縣隸焉葉爾羌卽古莎車國設莎車府治之於漢城  
置莎車縣回城置莎附縣隸焉和闐卽古于闐國設于闐  
直隸州治之並置于闐縣隸焉英吉沙爾卽古依耐國於  
其地設依耐直隸同知凡二府所屬統轄於喀什噶爾兵  
備未及行而宗棠內召以通政使劉錦棠代之光緒八年  
遣伊犁款議成俄人反我侵地時侍郎崇厚入俄結約尋  
紀澤爲二等公使代之紀澤據俄圖畫以失地逮問而以侍郎曾  
界於是俄盡有我霍爾果斯河西之地總督譚鍾麟暨劉  
錦棠因損益宗棠先後所條列上之疏入報可十年增設  
甘肅新疆巡撫布政使各一員於是悉撤舊設都統參贊  
辦事領隊以下各員而於回疆東四城設分巡兵備道駐  
阿克蘇設喀喇沙爾直隸撫民廳庫車直隸撫民廳溫宿  
直隸州拜城縣烏什直隸撫彝廳西四城設分巡兵備道

駐喀什噶爾回城

卽今疏附縣

兼管通商事設疏勒直隸州疏

附縣英吉沙爾直隸撫彝廳莎車直隸州葉城縣瑪納巴什直隸水利撫民廳和闐直隸州于闐縣北路改迪化直隸州爲迪化縣添設迪化府爲省治轄迪化及舊設昌吉綏來阜康奇台五縣徙奇台縣於古城遷古城巡檢於舊治是年凡設府一廳五直隸州四縣四改縣一徙縣一其哈密鎮西吐魯番如故十二年設庫爾喀喇烏蘇廳十三年裁伊犁撫民同知升伊犁廳爲府附府設綏定縣以廣仁瞻德拱宸塔勒奇四城隸之是爲西六城將軍仿內地駐防之例移住惠遠滿城設寧遠縣以惠遠熙春兩城隸

之是爲東三城設伊塔分巡道兼管通商事設霍爾果斯  
分防廳精河直隸撫民廳改塔爾巴哈台理事通判爲塔  
城直隸撫民廳二十四年巡撫饒應祺復奏設新平縣二  
十八年奏請增改各廳州縣於是南路西四城升疏勒爲  
府增置伽師縣升莎車爲府增置蒲犁分防廳皮山縣洛  
浦縣改瑪納巴什廳爲巴楚州東四城升溫宿爲府增置  
溫宿縣柯坪分縣升喀喇沙爾廳爲焉耆府增置輪台縣  
婼羌縣改庫車廳爲直隸州增置沙雅縣北路增置孚遠  
縣鄯善縣呼圖壁分縣是年凡升設府三改直隸州一州  
一增廳一縣九分縣二諸府廳州縣皆分隸四道自光緒